

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffiannut aallartitat siulittaasuat aalajangiiffigisassatut siunnersuut manna saqqummiuppa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 1/2013-imik, ataani allasimatut oqaasertalimmik, Inatsisartut tapersiinnissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalackersuisunut kaammattuutigaa nunat pineqartut akornanni peqqinnissaqarfimmi sulisussanik ilinniartitsisarneq pillugu suleqatigeqqullugit kiisalu qularnaarniaqqullugu nunat pineqartut akornanni peqqinnissaqarfinni sulisut paarlaateqatigiittarnissaminnut periarfissaqarnissaat. Peqatigitillugu nunat pineqartut kaammattorneqarput tarnikkut nappaatinut tunngasutigut suleqatigiinnerup ineriartorteq-qinneqarnissaanut periarfissat misissoqqullugit, napparsimasunik katsorsaasarneq sulisussanillu ilinniartitsisarneq eqqarsaatigalugit.

Tunngavilersuut:

Nunat Avannarliit Killiit Siunnersuisoqatigiiffiat 2013-imi januaarip qiteqqunnerani Islandimi Ísafjörðurimi aalajangersimasumik qulequtaqartitsilluni ataatsimeersuartitsivoq qulequtaralugu: Nunani avannarlerni killerni peqqinnissaqarfinni unammilligassat periarfissallu. Ataatsimeersuarnermi inerniliussat ilagaat naak peqqinnissamut tunngasut eqqarsaatigalugit nunat avannarliit killiit qanittumik annertuumillu suleqatigiinnissaat amerlasuutigut pissusissamisooraluartoq suleqatigiinneq killilerujussuummat, tamanna naak nunatut sanileriikkaluarluta angallangikkullu pitsaasumik immitsinnut attaveqaraluarluta, taamatullu aamma amerlasuutigut aningaasatigut pissarsissutaanerusinnaagaluartoq sullissinernik nunat pineqartut pingasut akornanni pisisoqarsinnaagaluarpat, taamatullu aamma ajornartorsiutit unammilligassallu amerlasuutit assigiikkaluartut. Siunnersuisoqatigiiffiup kissaatigaa nunani pingasuni naalackersuisut tamanna iluarsiniassagaat.

Nunat pineqartut akunnerminni suliassaqarfippassuarni peqqinnissakkut pitsaasumik suleqatigeereerput, Siunnersuisoqatigiiffiup ataatsimeersuartitsinerani ersertutut. Siunnersuisoqatigiiffiup kissaatigaa suleqatigiinneq tamanna nunani pingasuni peqqinnissakkut sullissineq eqqarsaatigalugu suliassaqarfinnut allanut aamma siammarneqarnissaa. Ataatsimeersuarnermi peqqissutsimut tunngasutigut suliassat eqqarsaatigalugit inerniliussat ilagaat ullumikkornit suleqatigiinnerup annertunerunnginneranut pissutaasut pingaarnerit ilagigaat nunani pingasuni peqqinnissaqarfiit assigiinngitsut akornanni sulisut akornanni amigartumik attaveqatigiittoqartarnera.

Nunat pingasut akornanni killeqarfiit pitarlugit suleqatigiinnerup sakkortusarneqarnera pitsaanerpaamik pisinnaavoq peqqinnissaqarfinni sulisussat ilinniartitaaneri aqqutigalugit sulisunillu paarlaasseqatigiittarnerup qularnaarneqarneratigut. Nunat avannarliit killiit ataatsimut isigalugit peqqinnissaqarfinni sulisussanik ilinniartitseriaatsit ajoriinnagassaanngitsut pigineqareerput, taakkunanilu nunanit allanit marlunnit ilinniartoqartalerpat tamanna taakkununnga aningaasatigut aamma pissarsissutaasinnaagaluarpoq. Nunani avannarlerni killerni peqqinnissaqarfiit annertuunik ilisimasaqarput misilittaqarlutillu nunani allani atorneqarsinnaasunik, minnerunngitsumik nunani pineqartuni pingasuni ataatsimut unammilligassat assigiinngitsut qaangerniarneqarnissaat eqqarsaatigalugu. Aaqqissuussaamik sulisoqarnikkut paarlaasseqatigiittalernikkut

qularnaarneqarsinnaavoq ilisimasat misilittakkallu taakku nunani allani peq-qinnissaqarfinni sulisunut ingerlateqqinneqarsinnaanissaat peqatigitillugulu qulaarnaarneqarluni nunani pineqartuni pingasuni peqqinnissaqarfinni sulisut akornanni attaveqaatinik inummiillu inummut attaveqaatinik pilersitsisoqarnera.

Tamanna aamma nunat pineqartut akornanni tarnikkut nappaatinut tunngasutigut suleqatigiinnermut atuuppoq. Nunani pineqartuni pingasuni ajornartorsiutit ilaatigut taakkuummata amerlasuutigullu nunat pissusii innuttaasullu ukiumikkut katitigaanerat assigiissuteqarmata paasissutissanik, ilisimasanik misilittakkanillu paarlaasseqatigiittarnerup nukittorsarneqarnera nunanut pingasunut tamanut iluaqutaasussaavoq. Tamatumani annertuumik ilinniarfigeqatigiittoqarsinnaavoq, taamaattumillu tamatumani nunat pineqartut akornanni suleqatigiinneq annertusarneqarluni nukittorsarneqarpat aningaasatigut iluaqutissartaqarluni.

Taamaattumik nunani pineqartuni pingasuni peqqissutsimut naalakkersuisut kaammattorneqarput nunat pineqartut pingasut akornanni tarnikkut napparsimasunik sullissisinnaasunik ilinniartitsisinnaanermut periarfissat misissoqqullugit, taamatullu aamma misissoqqullugu katsortariaqartut maannakkornit annerusumik iluaqutaanerusumik nunat avannarliit killiit arlaanni suliaritissinnaanermut periarfissaqarnerisut.